

Morning Dogri (NSD) Bulletin 20-11-2024

आकाशवाणी

1 सख्त सुरक्षा बंदोबस्त हेठ झारखंड दिएं 38 ते महाराष्ट्र दिएं सब्बनें 288 विधानसभा सीटें पर मतदान चलै करदा ऐ। महाराष्ट्र दी नांदेड़ लोकसभा सीट ते पंजाब, उत्तर प्रदेश, केरल ते उत्तराखंड दिएं 15 विधानसभा सीटें लेई उपचुनांस बी अज्ज होआ करदा ऐ।

2 प्रधानमंत्री नरेंद्र मोदी होरें ब्राजील च जी-20 शिखर सम्मेलन गी संबोधित करदे होई सब्बनें लेई मते साफ-सुथरे ते टिकाऊ भविक्ख गी यकीनी बनाने दे जत्नें च तेजी आहन्ने पर जोर दिता ते आखेआ जे भारत पेरिस समझौते दिएं प्रतिबद्धताएं गी पूरा करने आहला जी-20 समूह दा पैहला मुख ऐ। ब्राजील दौरा सम्पन्न करने दे बाद प्रधानमंत्री मोदी 3 दिनें दी गयाना यात्रा पर उत्थे पुज्जी गेन।

3 प्रधानमंत्री मोदी ते आस्ट्रेलिया दे उंदे हमरूतबा अल्बनीज हुंदे नै दुए भारत-आस्ट्रेलिया सालाना सम्मेलन दा आयोजन होआ।

4 कर्मचारी राज्य बीमा स्कीम तैहत सितंबर च 20 लक्ख 58 ज्हार नमें कर्मिं गी दर्ज कीता गेआ।

5 55मां अंतरराष्ट्रीय भारती फिल्म महोत्सव IFFI अज्जै थमासं गोवा च शुरू होने जा'रदा ऐ।

6 बिहार च खेड्डी जा'रदी महिला एशियाई हॉकी चैंपियान ट्राफी दे फाइनल च अज्ज भारत दा मकाबला चीन कन्ने होग।

<><><><><><>

Jharkhand-Maharashtra-Elections

सख्त सुरक्षा बंदोबस्तें हेठ झारखंड विधानसभा दे दुए गेड़ ते महाराष्ट्र विधानसभा दे इक्कै गेड़ दे चुनां लेई मतदान बड्डले 7 बजे दा शुरू होई चुके दा ऐ। झारखंड दे 12 जिलें च फैले दे 38 विधानसभा हल्कें च वोट पोआए जा करदे न। 7 बजे शुरू होए दा एह मतदान संझा 5 बजे तोड़ी जारी रौहग जिसलै जे किश संवेदनशील इलाकें च वोट पाने दी प्रक्रिया 4 बजे तगर चलोग। इस गेड़ दे मुकाबले च 528 मेदवार चुंs मैदान च न जिंदे सियासी भविक्ख दा फैसला अज्ज संझा तोहड़ी वोटिंग मशीनें च बंद होई जाग। तोआई महाराष्ट्र दिएं सब्बनें 288 सीटें पर अज्ज इक्कै गेड़ च मतदान होआ करदा ऐ। उत्थें वोट पाने दा सिलसिला शामी 6 बजे तगर चलोग। उत्थे ऐकती 4 ज्हार 136 मेदवार चुनां मैदान च न जिंदे चा 2 ज्हार 86 आजाद मेदवार न। एहदे अलावा महाराष्ट्र दी नांदेड़ लोकसभा सीट ते पंजाब, उत्तर प्रदेश, केरल ते उत्तराखंड दिएं कुल 15 विधानसभा सीटें लेई उपचुनां बी अज्ज होआ करदा ऐ। सब्बनें राज्यें लेई वोटें दी गिनतरी शनिवारें 23 नवंबर गी होग।

<><><><><><>

PM-G 20

प्रधानमंत्री नरेंद्र मोदी होरें कल ब्राजील दे रियो डी जनेरियो च टिकाऊ विकास ते उर्जा परिवर्तन बारे जी-20 शिखर सम्मेलन दे त्रीए सत्र गी संबोधित कीता। विदेश मंत्रालय दे प्रवैता रणधीर जयसवाल होरें जानकारी दिती ऐ जे प्रधानमंत्री

मोदी होरें सब्बनें लेई मते साफ-सुथरे ते टिकाऊ भविक्ख गी यकीनी बनाने दे जत्नें च तेजी आहन्ने पर जोर दिता। मोदी होरें अंतरराष्ट्री सौर गठबंधन, इक विश्व इक सूरज इक ग्रिड ते कुल संसारी जैव ईंधन गठबंधन जनेए पर्यावरण कन्ने मेल खंदे रहन-सैहन दे सिद्धांतें, तौर-तरीकें ते उपाएं दे महत्वै गी उजागर कीता। उनें टिकाऊ विकास प्राथमिकताएं गी अगड़े बधाने लेई ब्राजील दे फैसले दा बी सुआगत कीता। अपने संबोधनै च प्रधानमंत्री होरें लगातार ते टिकाऊ विकास च तेजी आहन्ने दे भारत दे जत्नें दा जिक्र कीता ते आखेआ जे भारत पेरिस समझौते दिएं प्रतिबद्धताएं गी पूरा करने आहला जी-20 समूह दा पैहला मुख्य ऐ।

<><><><><><>

PM-Gyana

प्रधानमंत्री नरेंद्र मोदी होर रियो डी जिनेरियो च जी-20 शिखर सम्मेलन च हिस्सा लैने दे बाद गयाना दी 3 दिनें दी यात्रा पर उत्थे पुज्जी गेन। 1968 दे बाद भारत दे कुसै प्रधानमंत्री दी एह पैहली गयाना जात्रा ऐ। मोदी होर जार्ज टाउन च राष्ट्रपति डॉक्टर मोहम्मद इरफान हुदे नै गल्लबात करंगन, दुए कैराकॉम-भारत शिखर सम्मेलन च शामिल होंगन ते गयाना दी संसद गी बी संबोधित करंगन। यात्रा दौरान उंदा उत्थे रवा करदे भारतीय मूल दे लोकें कन्ने मिलने दा बी कार्यक्रम ऐ।

<><><><><><>

PM-Modi Australia-Summit

प्रधानमंत्री नरेंद्र मोदी ते उंदी आस्ट्रेलियाई हमरूतबा एनथोनी अल्बनीज होरें कल रियो डी जनेरियो च जी-20 शिखर सम्मेलन दे बक्ख बाहरें भारत आस्ट्रेलिया दे दुए सालाना शिखर सम्मेलन दा आयोजन कीता। दौनें लीडरें रक्षा ते सुरक्षा, बपार ते रास-पूंजी लाने, शिक्षा, हूनर, खेड्डें, अंतरिक्ष, गतिशीलता ते लोके-लोके बश्कार रिश्ते सने क्षेत्रें च व्यापक रणनीतिक सांझेदारी गी होर अगड़ा बदाने दे अपने धेड़यै गी दोहराया। उनें नवीकरणी उर्जा सांझेदारी दी शुरूआत दा सौआगत कीता। एक्स पर सोशल मीडिया पोस्ट च प्रधानमंत्री मोदी होरें आखेआ जे गल्लबात दे बेहतरिन ते नतीजाकुन रेई ते भविक्ख दे क्षेत्रें उप्पर ध्यान दिता जाग जेदे कन्ने कुल संसारी तरक्की ते टिकाऊपन होर बी दिक्खने गी मिलोग। एक्स पर सोशल मीडिया पोस्ट पर उनें आखेआ जे भारत ते आस्ट्रेलिया स्हादे नेट जीरो लक्ष्य गी पूरा करने लेई ते अक्षय उर्जा च तब्दीली गी बढ़ावा देने लेई रलिये मता सारा कम्म करा करदे न।

<><><><><><>

ESIC

सरकारै आखेआ ऐ जे इस बरे सितंबर म्हीने 20 लक्ख 58 जहार नमें मजदूर कर्मचारी राज्य बीमा योजना तैहत जोड़े गे न। कर्मचारी राज्य बीमा निगम आसेआ जारी कीते गेदे प्रोविजनल पेरोल आंकड़ें मूजब नमें कर्मचारियें दे अलावा

पिछले बरे दौरान इस्सै अवधि दे मुकाबले 9 फीसद दा इजाफा दर्ज कीता गोआ ऐ। आंकड़ें मूजब कुल दर्ज नांs च 10 लक्ख 5 ज्हार कर्मचारिएं जेड़ा 49 फीसद बनदा ऐ, उंदी उम्र 25 बरे तगर ऐ। तकरीबन 23 ज्हार 43 नमें इदारे गी ई.एस.आई योजना दे समाजी सुरक्षा इदारे च आंदा गोआ ऐ तां जे कम्म करने आहलें दी सुरक्षा यकीनी बनाई जाई सकै। पेय-रोल आंकड़ें मूजब कुल दर्ज नां च 10 लक्ख 5 ज्हार कर्मचारिएं जेड़े 49 फीसद बनदा ऐ उंदी उम्र 25 बरे तगर ऐ।

<><><><><><>

Russia-Atom

रूसी राष्ट्रपति व्लादिमीर पुतिन होरें देसै दे नमें परमाणु सिद्धांत दे हुकमै पर दस्तखत करी दिते न। क्रेमलिन वेबसाइट पर शायी हुकमै च आखेआ गोआ ऐ जे कुसै राष्ट्र जां सैन्य गठबंधन जां ब्लॉक आसेआ रूस जां ओहदे सहयोगी देशें पर कीते गेदे हमलें गी समूलचे ब्लॉक दा हमला मन्नेआ जाग।

<><><><><><>

Delhi-Pollution

दिल्ली एन.सी.आर च ब्हा दी स्थिति अजें बी बड़ी मती खराब श्रेणी आहली बनी दी ऐ। उत्थें अज्ज बड़डलै 7 बजे औसत वायु गणवता सूचकांक ए.क्यू.आई 422 दर्ज कीता गोआ।

<><><><><><>

IIFI-Goa

भारत दा अंतर्राश्ट्री फिल्म उत्सव अज्ज दपैह्री थमां गोवा च शुरु होआ करदा ऐ ते एह् 28 नवम्बर 2024 तगर जारी रौह्ग। आकाशवाणी संवाददाता मूजब इस ब'रे लग्गा करदे इस फिल्म उत्सव च केई नमी चीजां जोड़ियां गेइयां न ते एह् उत्सव ऐगती युवा फिल्मकारें गी समर्पित ऐ। इस ब'रे 100 मुल्खें थमां 400 शा मतियां फिल्मां दस्सियां जाडन। गोवा सरकारें इस उत्सव गी बवस्थित ढंग्गै सिर करोआने लेई सुरक्षा सने होरने बी सब्बै लोइचदे बंदोबस्त जकीनी बनाए दे न। एह् फिल्म उत्सव, वैश्विक सिनेमा ते सांस्कृतिक आदान-प्रदान दा जशन मनाने दा इक बड़ा शानदार ते बधिया मंच साबत होग।

<><><><><><>

Hockey-Final

हॉकी च अज्ज बिहार दे राजगीर च महिला एशियाई चैंपियन्स ट्रॉफी दे फाइनल च भारत दा मकाबला चीन कन्नै होग। भारत नै कल सेमीफाइनल च जपान गी 2 गोल कन्नै हराइयै फाइनल च प्रवेश कीता हा। इस मकाबले च जपान दी टीम कोई गोल नेई करी सकी।

<><><><><><>